

**MB Khalid juga mahu gandingan Anwar-Azizah**  
**Malaysiakini.com**  
**September 14, 2010**

Menteri Besar Tan Sri Khalid Ibrahim hari ini menyatakan sokongannya kepada sekumpulan pemimpin akar umbi PKR Selangor yang mahu Datuk Seri Anwar Ibrahim dijadikan presiden parti itu manakala presiden sekarang, Datuk Seri Dr Wan Azizah Ismail dijadikan timbalannya.

Khalid memaklumkan pendiriannya itu pada satu majlis yang beliau hadiri di Klang yang dianjurkan oleh Majlis Muafakat Kepimpinan Keadilan Selangor.

Kumpulan itu yang muncul minggu lalu dengan kebanyakan pemimpinnya terdiri daripada ketua-ketua di cabang PKR mahu gandingan Anwar dan Azizah menerajui PKR.

Jika ini tidak dapat dilaksanakan, kumpulan itu mahu Azizah dan timbalannya Syed Husin Ali dikekalkan jawatan mereka.

Dalam ucapannya kepada kira-kira 120 pemimpin akar umbi, Khalid berkata adalah penting bagi PKR mengamalkan demokrasi, tetapi adalah lebih penting bagi memastikan pemimpin yang berupaya dipilih.

Beliau mengibaratkan usaha kumpulan itu sebagai satu bentuk musyawarah yang diadakan selepas kemangkatan Nabi Muhammad SAW oleh pengikutnya untuk memilih seorang pemimpin baru dengan tujuan mengelakan saingan yang tidak menyihatkan.